

# Primera Carta a Timoteo

## Kjibokwo ère tara Pablorè

### Timoteo kong

## Kjibokwo ère sorè

Domer shäng kjlara ko Pablo. E Sbö tjlökwö laga Jesús äska wleniyo. Domer shäng kjlara obi ko Timoteo. E data Grecia so, mekë judío. Dëna mite obishko ga sök Listra kjokyo. Eshko ga Jesús roy pjlú lara Pablorëshko ga tjlökwö kjrara. E irgo ga e kjrara Pablorè beno shäng parkë ba tjok, tak pjang Hechos 16.1-4 go sorè li eni. E irgo ga parkono ara Jesús roy pjlú lè kjok shto oblë oblë.

Pjlara ga parkë shäng Éfeso kjokyo, Jesús tjlökwö kjragara löng eshko li kägäyo. Sök eshkosho ga kjibokwo ère tara Pablorè ba kong. Woyde ga Jesús tjlökwö kjrara kägäyoga parkë sorè li tara ba kong. Nopga wlëy pak oblë oblë shäryë sorè li tara ba kong. Llëbo owa shärye Jesús tjlökwö kjragara löng eshkorè li lgweya sorè li tara ba kong bakoe.

<sup>1</sup> Kjibokwo ère taga tja Pablorè. Sbö, e bi döga. Koshëy löng li, e Cristo Jesús. Tja kjrara, ichara lok ber ba tjlökwö roy laga Cristo Jesús äska.

<sup>2</sup> Timoteo, kjibokwo ère ichër jek bop kong. Pja mär Cristo Jesús go, pinor bop kong sorè li eni. E kjïshko ga pja bor wa wleni.

Rokër Data Sbö kong, bi Tjlapga Cristo Jesús kong ga ba wopjlú li kjïshko ga pja kjimte lok ara, pja songe le ñyado, pja ie lok ber shäng wlëp bakoe.

### *Nopga oba ping tjlōkwo bek llēm li go wleniyo*

<sup>3-4</sup> Éfeso kjokyo ga kjong kjong lōng oba ping tjlōkwo bek llēm li go. Tja jek öör Macedonia kjokyoshko ga pja rokoror ber sök Éfeso kjokyo wlo. Pja ichoror tjlē nopga lōng eshko li kong ga «Tjlōkwo bek llēm li lëy ame. Llëbo weno tjlapgaga tek dēnashko so kong li lëy ame. E jyō bakoe. Ga pjāy kjlara kjlara tjëyo kjone dey li, lëy ga pjir llëme. E kjīshko ga e lanyotkëy ame. E lanyotkoromi ga oba ënglë kar kar erä. Woyde Sbörë ga shji mär ba go shara, shji ber lōng ba pak li shäryë wlo.»

<sup>5</sup> Pja ichoror eni, shji Jesús tjlōkwo kfragaga ëng woydë ara kar kar wlo. Shji ëng woydë wlo ga woyde ga llëye owa woyotjlīy llēm, llëbo pjlu miydëy li shäryëy eni, shji mär Jesús go jlōkoyo bakoe.

<sup>6</sup> Kjong kjong omshäryë lōng ame. Llëbo tjwlō llēm li lanyotke beno lōng eröe.

<sup>7</sup> Opyë woydë ber lōng no pingga kjok llgwekklo tara Moisésdë li go. Le lōng jlō wleni, gueniyo jlōkoyo ga llëye le lōng li, e llë loklo miyde lōng llëme.

<sup>8</sup> Miydëy pjlu ga kjok llgwekklo li, e pjluë. Gueniyo llëno wlo, woyde ga miydëy pjlu guing.

<sup>9</sup> Kjok llgwekklo li, e twara Sbörë beno oba jëk lōng pjlo bëy li llgwekklo llēm, e twara beno oba jëk lōng llëbo owa shäryë li llgwekklo. E beno ëye kjok llgwekklo kolë llēm li llgwekklo, ëye llëbo owa shäryako llēm li miydë pjlu gueniyo shärye enido li llgwekklo, ëye, ba kong ga Sbö tjwlō llēm li llgwekklo, ëye owa shäryë enido li llgwekklo, ëye Sbö kolë llēm li llgwekklo, ëye Sbö bangkjrë llēm li

llgwekklo, eye ba data, ba mekë zrök li llgwekklo, eye no oblë zrök li llgwekklo,

<sup>10</sup> eye pë no orkwosmono ba tjok llëm tjok li llgwekklo, domer pë domer oblë tjok li llgwekklo, eye no shak ga soyneya oblë kong ä li llgwekklo, eye jyörkë ä li llgwekklo, eye tjlë jlökoyo gueniyo oblë jyöyotke shdungoba wlo ä li llgwekklo bakoe. Shärye enishko ga tjlökwo bek li shäryayde löng llëme.

<sup>11</sup> Tja kjrara, ichara Sbörë ba tjlökwo roy pjlú lë oba kong. Sbö, e wopjlúe.

### *Pablo kjimtara Tjlapgarë ara*

<sup>12-13</sup> Dënashko ga Sbö läywër shäng owa, ba tjlökwo kjrägaga irpjan shäng, llëbo owa shäryër ba kong wlo. Gueniyo eshko ga tja songe lara Sbörë, llëye shäryër shäng li owa miydoror shäng llëm kjishko, ba tjlökwo kjrotë llëm obi kjishko bakoe. Eni ëmdë ga tja ña bi pjluyo Cristo Jesúsde ga parkaga pjlú wleniyo, ga tja iara beno shäng ba parkaga shara, tja kong dbo twara shäryër wlo. E kjishko ga tja wopjlú ba tjok.

<sup>14</sup> Tjlapga wopjlú li kjishko ga tja kjimtara ara anmoyö. Tja tona beno tjeng Cristo Jesús tjok kjishko ga tja iara beno shäng mär ba go, ga tja iara oblë woydë ara baïya dik.

<sup>15</sup> «Cristo Jesús öör kjok ëre kjing go nopga owa li döga» lëba eni ñyadoe. E eni jlöe. Tjlökwo ëre kjrako. Tjara llëbo owa shäryono ara, oba uunkong kjinmo.

<sup>16</sup> Tja owa anmoyö kjishko ga tja songe lara Sbörë, ga tja kjimtara, ñya nopga mär löng ba go lirë wlo. E go ga miyde lok ga Jesucristo, e iirkë bi kong

maling llëm, ga ëye omtjłkwo kjrë ga kjimte, ga ie ber lǒng së İyado ba tjok bakoe.

<sup>17</sup> E kjışko ga Sbö, e poshrëy, iëy ber kësband, tjwłö ara İyado. Bi pjluyo sök İyado, wolon llëm, İgöy llëm, Sbö kjılaraso İi e. Ber eni.

<sup>18</sup> Timoteo, pja bor wa wleni. Dënashko ga pja parkë Sbö kong sorë lara Sbörë bi pjeyoga kjone kjone kong, ga epga omłono bi kong. Tjłkwo İër bop kong shäryëp wlo İi ëre, e İër bop kong, paklara lok tek dënashko İi shäryëp pjlú anmoyö wlo.

<sup>19</sup> Eni ga pja mär shäng Jesús go jlökoyo, ga llëbo pjlú miydëp İi shäryëp eni. Kjone kjone omshäryono eni llëme. E kjışko ga epga jëk Sbö tjok ame.

<sup>20</sup> Himeneo omshäryono eni, Alejandro bakoe. E kjışko ga ioror beno tjeng Ä wloshko. E goshko ga opping bi Sbö, e İäywe owa ame wlo.

## 2

### *Shji syöshtë sorë*

<sup>1</sup> Bäm go ga rokër bop kong ga pja syöshtos Sbö kong nopga uunkong kjışko. Rokos ba kong ga epga kjimte wlo. Ga llëbo pjlú shäryara İi kjışko ga pja tjłë ba kong ga «Tja wopjlú bop tjok» İëp ba kong eni.

<sup>2</sup> Pja syöshtë pjlupga kjışko, no ichagaga kjışko bako, shji ber lǒng włëp wlo, shji barwe lok llëm wlo bakoe. Eni ga Sbö poshrëy ga pjlú, llëye woyde Sbörë İi shäryëy ga pjlú bakoe.

<sup>3</sup> Shji syöshtë eni, e pjlúe. Shäryëy eni ga Sbö bi döga ber wopjlú bi tjok.

4 Woyde ga nopga där uunkong. Woyde ga tjlōkwo bek li miyde lok wēlē bakoe. Tjlōkwo bek li, e eni:

5 Sbō, e kjaraso; bi iaga ber lōng wlēp Sbō tjok'li, e kjaraso bakoe; domer Cristo Jesús li e;

6 e optwono wolono, ber nopga uunkong potjwlēkklo wlo, epga där wlo. Tjlōkwo ère dbaryo iara Sbörē beno li öötong tjan.

7 E kjishko ga tja ichara ba roy shdök, tja iara beno shäng ba tjlōkwo roy'лага Jesús äska. Tja shäng jyörkē llēme. Tja tjlē shäng beke. Tja ichara tjlōkwo bek li roy lē nopga judío llēm wleniyo kong, shji mär Jesús go sorē li lēr ba kong bakoe.

8 Woydër ga nopga lōng kjok kjwang jikong syōshtë Sbō kong. Gueniyo ga orkwo poyong syōshtë wloshko ga woydër ga wotjlik bëy, iirkē è kong llēm, èng dboryë kar kar iir go llēm bakoe.

9 Walëga, e woydër ga shwong pjung pjlo bek, yōtso. Wotjlik doyë, opyë shäng oba bokso wolësowa anmoyō, ïya domergarë wlo ga owa. Opyë ber wolësowa wlo le ga käkzong poshäre ara anmoyō, dbur sho shōylör pje ara, shwong tjwlō ara wleniyo pjüya ga owa.

10 Opyë ber wolësowa wlo ga woydër ga llëbo pjlu shäryayde dey. Walëga Sbō poshrëga le ga woyde ga wotjlik eni.

11 Èye shäng Sbō tjlōkwo roy lëshko ga woyde ga kuya walëgarë lōng kjing, dborye lok llēme.

12 Nopga èng tōno lōng Sbō tjlōkwo roy lē èng kongshko ga walëga ichër domerga ping llēme. Domerga ichaga ber walërë llēme. E kjishko ga woydër ga kuya walëgarë lōng kjing erä.

<sup>13</sup> Adán, e shäryara Sbörë bäm go. Eva, e shäryara ba irgo.

<sup>14</sup> Jyāpgwara Ärë'li, e Adán llëme. Evara jyāpgwara, ga llëbo owa shäryara.

<sup>15</sup> Gueniyo walëga, e döya wlo jlõe. Gueniyo ga iara beno wapga weng wlo, wapga dë wlo. Woyde ga mär Sbö go, oba woydë pjlu, jëk löng pjlo bek Sbö bokso, ikoba pjlu wlo. Shärye lok enira där.

### 3

#### *Jesús tjlökwo kjruga kägäyoga*

<sup>1</sup> Oba tjlë ga «Ëye wotjlík opyë ber sök Jesús tjlökwo kjruga kägäyo ga wotjlík llëbo shäryë pjluë» lëba eni. E eni jlõe. Tjlökwo ëre kjrako.

<sup>2</sup> Eni ga ëye pak ëre shäryë wlo ga woyde ga e llëbo owa shäryono lëba ga äe. Woyde ga boy kjaraso. Woyde ga llëbo shärye ga woyotjlíya yötso guing, jëk shäng yötso, pjlo bek, bangkjrëba wlo. Woyde ga ëbo tjwe ba shwoy ga wlokjre sök wopjlú iyado. Woyde ga oba ping pjlu wleniyo.

<sup>3</sup> Woyde ga nelötkë ä wleniyo llëm, ëngkwë ä wleniyo llëm bakoe. Woyde ga shäng wopjlú wleniyo, ëng dboryë oblë tjok ä wleniyo llëm, dbur sïyo llëm wleniyo bakoe.

<sup>4</sup> Woyde ga ba pjeyoga löng ushko 'li de sök pjlo bek. Woyde ga e kole, bangkjre ba wapgarë pjluë.

<sup>5</sup> ¿Shärye ba ushko eni llëm ga Sbö tjlökwo kjruga de sorëro?

<sup>6</sup> Jesús tjlökwo kjruga löng kwlë já wleniyora, e iëy ber no kägäyo wlo llëme. Llëm ga ioroy wleni ga wotjlík owa kjwe, «Tja tjlwlo ara» le ba pjluushko Ä dik, ga ber shdungko bakoe.

<sup>7</sup> Woyde Ärë ga Sbö tjlökwo iëba ber tjwlö llëme. E kjishko ga woyde Sbörë ga tjlökwo kjruga kägäyo li, e bangkjre tjlökwo kjruga llëm wleniyo lirë bako, lanyotke lok owa ga ä wlo, Sbö tjlökwo iëba ber tjwlö ara wlo.

*Jesús tjlökwo kjruga kägäyo kjimtaga*

<sup>8</sup> Woyde ga Jesús tjlökwo kjruga kägäyo li kjimtagaga ber löng eni bakoe. Woyde ga jëk löng pjlo bek, bangkjreba wlo. Woyde ga tjlë bëy wleniyo, nelötkë ä wleniyo llëm, dbur shak jyö go ä wleniyo llëm bakoe.

<sup>9</sup> Woyde ga tjlökwo pina Sbörë bi kong li, e söya lok jlökoyo, jëk e go. Woyde ga llëbo pjlu miyde li shärye eni iyado bakoe.

<sup>10</sup> Woyde ga tjlïy bäm go guing. İnoy ga llëye owa shärye llëm ga ber tjlökwo kjruga kägäyo kjimtaga eshko jä.

<sup>11</sup> Woyde ga walëga ber löng eni bakoe. Woyde ga jëk löng pjlo bek, bangkjreba wlo. Woyde ga no läywe owa ä wleniyo llëme. Woyde ga llëbo shärye ga woyotjlïya yötso guing wleniyo. Woyde ga llëye le ë kong ga shärye eni wleniyo bakoe.

<sup>12</sup> Tjlökwo kjruga kägäyo kjimtaga li, e woyde ga boy kjlaraso. Woyde ga ba wapga, ba pjeyoga löng ba ushko li, e de sök pjlo bek.

<sup>13</sup> Llëbo pjlu shäryara ba pakshko ga iëba ber tjwlö ara. Eni ga shji mär Cristo Jesús go sorë le oba kong, ga llëye bangkjre llëme.

*Jesús tjlökwo, e tjwlö ara anmoyö*

<sup>14-15</sup> Tja wotjlik jek bop ik maling, gueniyo tja jek llono miydër llëme. E kjishko ga tja jek äär maling llëm wleni ga kjibokwo ëre tër, ichër jek bop

kong, woyde Sbörë ga ba wapga jëk sorë li miydëp kjobokwo ëre go wlo. Shji Jesús tjlökwo kragaga, shji Sbö wapga. Sbö sök ÿyado. Ga ba tjlökwo bek'li, e twara beno bi kong, söy wlo, e jlöe lëy oblë kong wlo bakoe.

<sup>16</sup> Ba tjlökwo jnena Sbörë li, e pina bi kong. Tjlökwo ëre tjwlo ara anmoyö jlökoyo. Ëre eni: Jesucristo, e weno shäng kjok ëre kjing go so no kjoyoe.

E beno pjlo bek Sbö bokso li pina Sbö Sëyarë oba kong.

E ña Sbö parkagaga kjok dogo sorë.

Roy laraba tjëyoga oblë oblë kong kjok kjwang jikong.

Tjlökwo kjararaba kjok ëre kjing go.

Ga söra Sbörë to jem kjok dogo.

## 4

### *Tjlökwo bek llëme*

<sup>1</sup> Sbö Sëya tjlë bi kong wëllë ga «Dbar tjwe kjwara ga kjone kjone, tjlökwo pimi löng li, e söya lok ame. Eshko ga jyäpgwe Ä sëyagarë, ga sëya li tjlökwo krayde shara» le.

<sup>2</sup> Tjlökwo owa li, e laga nopga jyö ä wleniyorë. Llëbo owa shärye lokshko ga bangyo ba kong ame.

<sup>3</sup> Epga tjlë ga «Shji orkwosmok ga owa» le eni, «Dli, e uako uunkong llëme» le eni bakoe. Eshko ga jyörkonoe. Dli llë pogo, e iara Sbörë beno uëy wlo. Ga shji tjlökwo bek'li kraga, dli llë uëyshko ga woyde Sbörë ga shji syöshtë ba kong, tjlë ba kong ga «Tjawa kong dli tworop ëre. Tjawa ber wopjlu bop tjok e kjishko» lëy eni.



4-5 Llëbo uunkong shäryara Sbörë li, e pjlú, Sbö tjlökwo tak beno pjang eni kjishko, dli li syöyoshtoroy kjishko bakoe. Eni kuzong ga «E uako llëme» lëy llëme. Woyde Sbörë ga uëy, shji wopjlú ba tjok dli li kjishko.

### *Timoteo poshduna Pablorë*

6 Bi pjeyoga Jesús tjlökwo kjruga li, e pīs tjlökwo ëre go. Eni ga pja ber Cristo Jesús parkaga pjlú wleniyo, ga pja opping jek këgong këgong tjlökwo bek söp shäng li goshko.

7 Llëbo weno tjlapgaga tek dënashko so kong, shji kjimte Sbö kolë llëm wleniyo, tjwlö llëm wleniyo, e läywëba bop kongshko ga tjlökwo kup llëme. Pja drön ëë, pja opsguë jëk shäng pjlo bek Sbö bokso wlo dey.

8 Shji drön ëë, bi doyo iëy ber kjlo kjang wlo, e ber bi kong pjlú jlökoyo. Eni gueniyo ga shji jëk shäng pjlo bek Sbö bokso, e tjwlö e kjinmo anmoyō. Shäryëy eni ga shji kjimte kjok ëre kjing goshko, ga shji to ber löng Sbö tjokshko ga shji kjimte eshko bakoe.

9 Lëba eni li, e eni jlöe. Tjlökwo ëre kjrako.

10 E kjishko ga shji parkë drön ara. Sbö sök ïyado, no döga li e, ga ëye mär ba go ga döya uunkong. E kjishko ga shji löng ba koshë.

11 Pja to shäng oba ping tjlökwo ëre go, ga ichos ba shäryë.

12 «Pja mite jā. Tjlökwo lëp borwa kong llëm e kjishko» lëba bop kongshko ga kolëp llëme. Pja tjlökwo lëp pjlú, pja jëk pjlo bek, oblë woydos pjlú, pja mär Sbö go, llëbo owa shäryëp llëm bakoe.

Shäryos eni, İya Jesús tjlökwo kjragaga löng lirë wlo, epga omshäryë bopoya dik wlo.

<sup>13</sup> Tja äätë llëm obi wopro ga pja ber shäng Sbö tjlökwo buk li lë oba kong, oba pim tjlökwo li go, dbokjrë wlo, ga poshdum bakoe.

<sup>14</sup> Dënashko ga pja parkë Sbö kong sorë li lara Sbörë bi pjeyoga kjone kjone kong, ga epga omilono borwa kong. E irgo ga tjlapgaga Jesús tjlökwo kjraga kägäyo orkwo iono lok bop dlu kjing go, pja ber shäng dboy Sbö kong wlo, ga pja kong kjok miydë twara Sbörë, pak li shäryëp ba kong wlo. Eni ga kjok miydë twara bop kong li go ga pak twara bop kong li shäryos İyado.

<sup>15</sup> Tjlökwo ëre woyotjlïp ara, shäryëp yõtso, pja jëk shäng ba shäryë jek këgong këgong İkoba uunkong wlo.

<sup>16</sup> Pja jëk pjlo bek, oba pim tjlökwo bek li go eröe. Pja opdos yõtso, e shäryëp wlo, ga rayëp llëme. Enira pja dâr, oba bop kuga li, e dâr bakoe.

## 5

### *Shji opshäryë ëng tjok sorë*

<sup>1</sup> Tjlapga këkboga, e llëbo owa shäryono ga wlöy kjang llëm, poshdüs yõtso dey, bop data wleni. Domerga luyo bop dorko anmoyöra, pja opshäryë bop lëmga tjok sorë ga pja opshäryos ba tjok eni bakoe.

<sup>2</sup> Walëga këkbogara, pja opshäryë bop mekë tjok sorë ga pja opshäryos ba tjok eni bakoe. Walëga luyo bop dorko anmoyöra, pja opshäryë bop dorga tjok sorë ga pja opshäryos ba tjok eni bakoe. Pja wotjlïk llëbo owa shäryë ba tjok sira llëme.

<sup>3</sup> Syãpgara, kjimtaga ërë llëm wleniyo ga kjimtozong.

<sup>4</sup> Gueniyo ga wapga, tjërga tjok wleni ga kjimtaga ber epgarë. Sbö bokso ga bek'li e. Epga, e kuna tek chilawa dwayo öötong kësëse. Era ba mekë, ba tjëtë beno syã li, e kjimtaga ber epgarë shara.

<sup>5</sup> Syã jlökoyo, kjimtaga ërë llëm wleniyo ga e mär ber Sbö go eröe. Ber shäng syöshtë ba kong shkë dba, kjimte wlo.

<sup>6</sup> Gueniyo syã, e wotjlik Sbö llëm, to shäng llëye wen ba pjlúshko li shäryë wleni ga e tjwlö ame, no wolono buk wleni. Era kjimtako llëme.

<sup>7</sup> Tjlökwo ëre los Jesús tjlökwo kragaga kong, llëbo shäryara lok owa lëba ga ä wlo.

<sup>8</sup> Eye ba pjeyoga löng ba ushko li kjimtë llëm ga tjlökwo kjrara li, e shärye shäng llëme. Sbö tjlökwo kragaga llëm löng li ëmdë ga ba pjeyoga, e kjimte.

<sup>9-10</sup> Jesús tjlökwo kragaga kjimtëy wlo li, e ko tëy kjibokwo go. Syãpga, e ko tëy kjibokwo e go wlo ga woyde ga lu pjloglo sak tjer (60) jem lëkong eröe. Woyde ga öör sök ba lanma tjok pjlo beke. Woyde ga llëbo pjlú shärye oblë kong ara, ba wapga kuna pjlo bek, ëye tjwe ba shwoy ga wlokjre sök wopjlú, Jesús tjlökwo kragaga äär ba ushko ga dreglo shkwe ber wopjlú wlo, no song wleniyo kjimte, parkë oblë kong ara bakoe. Woyde ga miydëba e go. Syãpga eniyo ko toydë pjang kjibokwo li go.

<sup>11-12</sup> Gueniyo ga syãpga mite obira ko tako pjang kjibokwo li go wlo llëme. Ko tëyshko ga tjlä ga «Tja orkwosmok ame. Tja parkë ber shäng Cristo kong eröe» le jlökoyo. Gueniyo e irgo ga orkwosmok woydë obi. Eshko ga tjlökwo lara Cristo kong

jlōkoyo li, e shārye lok ame. E shārye eni ga e llēbo owa shāryayde.

<sup>13</sup> E shāryayde dō llēme. Opsguē lōng shmirkē ara, to lōng sjok sjok oba lōng sorē ĩk, oba lāywe, tjlōkwo lako llēm li le bakoe.

<sup>14</sup> E kjīshko ga woydēr ga syāpga mite obi li ork-wosmok dey. Woydēr ga wapga tjok, ga ber lōng ba ushko, ba wapga dē, lāywe bi wloyogarē llēm wlo.

<sup>15</sup> Eerishko ga syāpga kjong kjong Jesús tjlōkwo rayono tjän, beno jēk lōng Ā tjok. Tjlōkwo ēre lēr bop kong e kjīshko.

<sup>16</sup> Eni ga walēga Jesús tjlōkwo kjraga, ba pjeyoga syāpga tjok wleni ga woyde ga kjimte om go, pak li ber Jesús tjlōkwo kjragaga oblē li kong llēm wlo, syāpga kjimtaga ērē llēm lōng li kjimte lok ga pjlú wlo.

<sup>17-18</sup> Sbō tjlōkwo tak pjang li tjlē ga «Sögĭa parkoklo wleniyo, e ichēy dwla kjwokākshko ga kjamo kjrochako llēm, dwla li ue ga pjlú wlo.»\* Tjlē obi ga «Ēye parkē ga e potjwlēkko.»† E kjīshko ga tjlapgaga Jesús tjlōkwo kjraga kägāyo parkē pjlú wleni ga woyde ga bangkjrēba pjlú, potjwlēkoba pjlú bakoe. Oba pingga Sbō tjlōkwo go, oba poshdungga, e woyde ga bangkjrēba, potjwlēkoba pjlú, oblē oblē li kjinmo.

<sup>19</sup> Jesús tjlōkwo kjraga kägāyoga li rotēbashko ga rotaga no kjaraso dōrē wleni ga tjlōkwo kjrēp llēme. Woyde ga no sōya ba rotaga lirē pjök mya ba tjok, «E ĩnorwa om go jlōkoyo» le lok wlo. Eni ga shdum ga pjlúe.

---

\* **5:17-18** Deuteronomio 25.4. † **5:17-18** Lucas 10.7.

<sup>20</sup> Eshko ga llëbo owa shäryono jlökoyo wleni ga woyde ga wlongko oba bokso, bangkjreba wlo, omshäryë lok eni llëm wlo.

<sup>21</sup> Ëye llëbo owa shäryono ga woydër ga llgwes yõtso, beke. «Kjwe woydër ara kjishko ga shdun llëme» lëy bi pjlúshko llëme. «Kjwe woydër llëm kjishko ga shdun ara» lëy llëm bakoe. Sbö, Cristo Jesús, Sbö parkagaga kjok dogo so, e löng bop ïga.

<sup>22</sup> Jesús tjlökwo kjruga kägäyo kjrëpshko ga shäryëp maling llëme. Jëk shäng pjlo bekde ïp yõtso guing. Llëm ga shäng llëbo owa shäryë wleni ga owa shärye shäng li ber pjlú bop kong lëba eni. Ga pja om go li llëbo owa shäryë llëme.

<sup>23</sup> Gueniyo ga pja bögwö bang ara wop sit wop sit kjishko ga di iopdë dö llëm, kjillgwö bo dyo dbo ara iopdë sira bakoe.

<sup>24</sup> Kjone kjone llëbo owa shäryono li miydëy jekdo. Gueniyo kjone kjone eni llëme. Miydëy llëm, jëk sorë ïnoy yõtso guing.

<sup>25</sup> Llëbo pjlú shäryëy li, e eni bakoe. Olö ga ïkoba wëllë jekdo. Olö ga ïgaba llëm, gueniyo dbar tjwe kjwara ga miydëba eshko jã.

## 6

<sup>1</sup> Ëye parkagaga tjwlëk löng pjir wleniyo ga woyde ga ba sogo bangkjre jlökoyo ïyado, Sbö lãywëba llëm wlo, tjlökwo lëy löng li lãywëba llëm wlo bakoe.

<sup>2</sup> Ba sogo, e Jesús tjlökwo kjruga wleni ga woyde ga bangkjre, parkë ba kong pjlú anmoyö, ba sogo kjimte shäng li, e ba pjeyo Jesús tjlökwo kjruga woyde ara wleniyo kjishko. Tjlökwo lëp nopga kong wlo, shärye lok wlo li e.

### *Llëbo tjwlō ara*

<sup>3</sup> Tjłōkwo'lara bi Tjlapga Jesucristorë shäryëy wlo li, e beke. Shji jëk pjlo bek Sbö bokso sorë'li miydëy e go. Ëye oba ping tjłōkwo oblë bek llëm wleniyo go ga

<sup>4</sup> krë ä wleniyo, llëye miyde llëme. Llëbo tjwlō llëm wleniyo'le ëng kong kar kar ä, go swlo wleni. Tjłë eni kjışhko ga wotjłik owa oblë kong ba llëbo kjışhko, ëng dboryë kar kar iir go, ëng lāywë owa, «Kjłara kjwe owa»'le ba pjlúshko ĩyado.

<sup>5</sup> Epga ëngkjwë ëng tjok'li pjir llëm, wotjłik owa kjışhko. Tjłōkwo bek'li miyde ame. Oba pīya'lok Sbö tjłōkwo go, dbur shak e go wlo eröe.

<sup>6-7</sup> Shji jëk pjlo bek Sbö bokso li, e tjwlō ara jlōkoyo. Gueniyo woyde ga shji lōng wopjłú bi llëbo tjeng'li tjok bakoe. Shji weno bukshko ga llëye söroy tek bi tjok llëme. Shji wolonoshko ga llëye söy jek bi tjok llëm bakoe. E kjışhko ga woyde ga shji lōng wopjłú bi llëbo tjeng'li tjok.

<sup>8</sup> Eni ga shji shwong tjok, shji dli tjok wleni ga woyde ga shji lōng wopjłúe.

<sup>9</sup> Gueniyo ëye opyë woydë dbur ara ga llëbo owa shärye. Opsrek lōng ara ba wotjłik owa'li go, gueniyo miyde lōng llëme. Eshko ga beno lōng song erä, to pjir wlo.

<sup>10</sup> Ëye dbur woydë ara anmoyö ga dbur wlëk wlo ga llëbo owa shärye llë pogo. Kjone kjone wotjłik dbur wlëk erä kjışhko ga beno lōng mär Sbö go ame, beno lōng song erä.

### *Pablo tjłëno Timoteo kong, Timoteo dbokjrë wlo*

<sup>11</sup> Gueniyo pja Sbö ĩ kuzong ga pja opkwos llëbo owa lër shäng bop kong li dwayo. Llëbo pjłú li

shäryopdë dey. Pja jëk shäng pjlo bek Sbö bokso. Pja mär Sbö go. No oblë woydos ara. Llëbo wen tjwe bop kong owashko ga pja wosonkë llëme. Pja llëbo shäryë oblë kong yötso.

<sup>12</sup> Pja drön ëë, pja mär Sbö go wlo, lorop nopga ara kong dënashko sorë li eni, pja ber shäng së ÿyado Sbö tjok wlo. Pja rokara Sbörë e kong wlo.

<sup>13</sup> Rokër bop kong ga tjlökwö los bor kong jlökoyo. Miydaga ber Sbörë, shji löng së, llë pogo löng së, e laga erë. Miydaga ber Cristo Jesúsde bako, era tjlökwö lono pjlu, Poncio Pilato boksho.

<sup>14</sup> Llëye loror bop kong li shäryos uunkong eni, äär jong bi Tjlapga Jesucristo tjwe iröng obi guing.

<sup>15</sup> Dbaryo li wlëna Sbörë om go, ga öötongshko ga tjwe eshko jã, ichak Sbörë.

Sbö, e wopjlúe.

Kjok ëre uunkong ichaga li e eröe.

Pjlupga uunkong pjluo li e.

No kägäyoga uunkong kägäyo li e

<sup>16</sup> Wolon llëm sök ÿyado li e eröe.

Iök jong kjwara shjiy, kãã lletllet wleniyo,

ëye äär eshko ga äe.

Sbö sök iök shjiy li roshko.

Ëye omïydë llëm,

ïgöy llëm bakoe.

Poshrëkko ÿyado li e.

Dbö ara ÿyado li e.

Ber eni.

<sup>17-19</sup> No kjone kjone dbur ara kjok ëreshko. Pja tjlä ba kong ga «Bömi dbur kjishko ga pjäy tjwlo ara, oblë kjinmo lëmi llëme. Dbur, e ÿyado llëm kjishko ga pjäy mär bömi dbur go dö llëme. Gueniyo Sbö, e

sök ãyado, llëbo twe bi kong ara, shji ber'löng wopjlú wlo. E kjĩshko ga pjãy mär ba go erö dey. Llëbo pjlú shãryozã. Shãryoromi eni'li, e tjwlö ara, bomi dbur kjinmo. Oblë ãmi ga song ga bomi llëbo shdözi ba tjok wopjlúe. Eni ga llëbo tjwlö ara li ber bomi kong kjok dogo, ga pjãy ie Sbörë ber löng së ãyado ba tjok» lëp ba kong eni.

*Kjibokwo pjirzlong*

<sup>20</sup> Timoteo, pja iara Sbörë beno shäng ba tjlökwö roy lë oba kong wlo. Eni ga shãryos yötso. Llëbo tjwlö llëm lanyotkëba löng'li, e jyö erä. Tjlë löng jlö wleni, gueniyo jlökoyo ga kjok miyde lok sira llëme. Ba tjlökwö li kup llëme.

<sup>21</sup> No kjone kjone, tjlökwö ëre kjrara, ga beno löng mär Sbö go ame.

Rokër Sbö kong ga ba wopjlú li kjĩshko ga pja kjimte ara.



**Sbö Tjłõ<sup>kwo</sup>  
New Testament and Shorter Old Testament in Teribe  
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Teribe

© 2008, 2007, Wycliffe Bible Translators, Inc.  
**All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

539cf8e3-01bf-5f34-8833-610f18367f8c